

Kejatuhan nilai ringgit tak jejas pertumbuhan ekonomi

Oleh Kama Firdaus Subbahi

Berita kejatuhan Ringgit Malaysia sering dilaporkan bukan sahaja di media tempatan, malah di media negara jiran seperti Brunei dan Singapura.

Kejatuhan nilai mata wang tempatan kali ini dikatakan mendadak dan paling teruk sejak krisis mata wang Asia pada tahun 1998 iaitu RM3.60 untuk setiap dolar Amerika Syarikat (AS).

Pada awal tahun ini nilai ringgit merosot 6.3 peratus dari setahun lalu berbanding dolar AS dan ia muncul antara mata wang paling teruk terjejas, selain mata wang Jepun yang menyusut 12 peratus.

Pengukuhan nilai dolar AS kepada RM3.60 telah memberi impak kepada rakyat kerana ia mempengaruhi corak perbelanjaan domestik, sama ada oleh golongan peniaga mahupun pengguna.

Lebih-lebih lagi paras ringgit yang rendah ini berlaku serentak dengan kejatuhan harga minyak dunia. Menurut Bank Negara Malaysia (BNM), penyusutan nilai ringgit ini berpunca daripada pengukuhan nilai dolar AS.

Namun demikian, pertumbuhan ekonomi pada kadar 5.6 peratus masih kukuh walaupun berdepan situasi mencabar

Bicara Ekonomi bersama



ketika ini, terutama disebabkan kejatuhan nilai ringgit dan harga minyak dunia yang seiring.

Bagi tahun 2014, jumlah pertumbuhan pelaburan negara adalah melebihi RM70 bilion dan daripada jumlah itu, RM30.7 bilion pelaburan terletak di bawah Wilayah Ekonomi Koridor Utara (NCER).

Jumlah pelaburan dalam industri dijangka berkurangan sedikit tahun ini disebabkan pertumbuhan ekonomi global masih tidak menentu, walaupun ekonomi AS sedang melalui proses pemulihan.

Tingkat kadar inflasi tempatan
Mata wang yang lemah berpotensi meningkatkan kadar inflasi tempatan dan juga harga barangan import menjadi semakin mahal.

Dari segi konsep, inflasi adalah suatu kenaikan dalam tingkat harga umum barangan dan perkhidmatan dari semasa ke semasa. Dalam erti kata lain, setiap unit

mata wang cuma dapat membeli barangan dan perkhidmatan dengan jumlah yang sedikit berbanding sebelumnya.

Maka, berlakulah penurunan jumlah permintaan domestik atau perbelanjaan (consumption) yang menyumbang kepada kemelesetan ekonomi.

Pelaksanaan Cukai Barang dan Perkhidmatan (GST) juga dilihat akan memberi kesan terhadap permintaan domestik yang mana jual beli barangan dan perkhidmatan dijangka mengalami sedikit kemerosotan.

Menurut Gabenor BNM, Tan Sri Dr Zeti Akhtar Aziz pada pengumuman Keluaran Dalam Negara Kasar (KDNK) suku pertama 2015, beliau menjangka perbelanjaan domestik akan lebih perlahan untuk tempoh baki sembilan bulan 2015 setelah pelaksanaan GST.

Walaupun permintaan pengguna menurun, ekonomi Malaysia dijangka masih mampu tumbuh dengan baik. Asas ekonomi negara terus kukuh dengan KDNK diunjurkan berkembang antara 4.5 dan 5.5 peratus pada tahun ini.

Antara petanda lain menunjuk ke arah pengukuhan ekonomi Malaysia adalah defisit negara yang semakin mengecil, rizab kukuh walaupun mengecil, mempunyai institusi kewangan diyakini, pengangguran rendah dan pelaburan

asing mencecah paras tertinggi.

Pendapatan negara kasar (PNK) perkapita tumbuh 47.7 peratus pada tahun 2010 daripada AS\$7,059 dan pada tahun 2014 mencapai AS\$10,426.

Menurut Timbalan Menteri Perdagangan Antarabangsa dan Industri, Datuk Hamim Samuri baru-baru ini, kejatuhan ringgit memberikan kebaikan kepada Malaysia kerana ia menarik lebih ramai pelabur ke negara ini disebabkan nilai mata wang yang rendah, sekali gus meningkatkan keuntungan dan membantu memulihkan ekonomi negara.

FAKTA NOMBOR

RM70 bilion

Jumlah pertumbuhan pelaburan negara tahun 2014

RM15.6 bilion

Hasil kerajaan menerusi cukai jualan dan perkhidmatan RMKe-10

Pengenalan GST juga akan menyumbang kepada hasil kerajaan sebanyak RM31.4 bilion setahun dalam tempoh lima tahun akan datang berbanding RM15.6 bilion yang dikutip menerusi cukai jualan dan perkhidmatan dalam RMKe-10.

Pelaksanaan GST dapat memperkukuhkan lagi asas ekonomi Malaysia memandangkan ia akan menjadikan kutipan cukai lebih cekap, sekali gus menjana hasil lebih besar serta merangsang pertumbuhan ekonomi.

GST adalah cukai penggunaan iaitu mereka yang berpendapatan tinggi akan berbelanja lebih berbanding golongan berpendapatan sederhana dan rendah. GST 6.0 peratus yang dikenakan adalah terendah di ASEAN dan antara terendah di dunia, menggantikan cukai jualan 10 peratus dan cukai perkhidmatan 6.0 peratus yang mana ia bukanlah cukai tambahan.

Justeru, langkah kerajaan Malaysia melaksanakan GST adalah satu tindakan tepat, lebih-lebih lagi sekiranya perbelanjaan kerajaan hasil daripada cukai berkenaan dapat disalurkan ke arah pengukuhan kapasiti pengeluaran dan produktiviti negara.

 **Penulis ialah** Pegawai Penyelidik, Institut Penyelidikan Ekonomi Malaysia (MIER)